

**Oleh : DATO' SRI MOHD NAJIB TUN ABD RAZAK**  
**Tempat : PARLIMEN MALAYSIA**  
**Tarikh : 24-04-2006**  
**Tajuk : USUL MENYOKONG BAGI MERAKAMKAN PERASAAN DUKACITA**  
**DI ATAS KEMBALINYA KE RAHMATULLAH ALLAHYARHAM**  
**YABHG. TUN GHAFAR BABA DAN UCAPAN TAKZIAH**  
**KEPADA KELUARGANYA**

Tuan Yang di-Pertua,

Saya dengan amat dukacita dan perasaan yang sungguh sedih mengemukakan di dewan yang mulia ini sokongan setulusnya kepada usul YAB Perdana Menteri bagi merakamkan ucapan takziah di atas kembalinya ke rahmatullah Allahyarham YABhg. Tun Ghafar Baba.

Tuan Yang di-Pertua,

Sesungguhnya telah sampailah ketentuan dan takdir Ilahi dengan pemergian seorang negarawan terbilang, Allahyarham Tun Ghafar Baba. Maka, tidak mungkin ada kata – kata yang dapat menghuraikan sepenuhnya tentang betapa banyak sumbangan tokoh besar ini kepada agama, bangsa dan tanahair tercinta.

Nyatalah beliau merupakan seorang individu unik yang telah mengharungi pengalaman hidup merentasi zaman penjajahan, memperjuangkan kemerdekaan dan seterusnya antara yang bertanggungjawab mengisi kemerdekaan negara.

Tuah ayam nampak di kaki, tuah manusia siapa yang tahu. Siapa sangka nasib awal seorang anak muda sebagai pemungut bola golf dan penjaja ubi kayu akhirnya berjaya ke tahap yang begitu tinggi menjadi Timbalan Perdana Menteri Malaysia.

Tuan Yang DiPertua,

Di sudut peribadi, Allahyarham Tun Ghafar amat disanjung sebagai seorang pemimpin yang berjiwa rakyat kerana sifatnya yang begitu bersederhana, merendah diri dan mudah mesra dengan semua lapisan masyarakat. Di kalangan rakan dan taulan beliau diketahui memiliki sifat yang sungguh mulia iaitu tidak segan mengakui latar belakang kehidupannya yang susah. Allahyarham sentiasa sahaja mahu belajar daripada pengalaman hidup sehingga berjaya memiliki kemahiran politik yang cukup tinggi dan halus.

Manakala kepada UMNO pula, pulangnya ke rahmatullah wira negara ini tentu amat memilukan semua ahli. Sesungguhnya tidak terhitung sumbangan yang telah diberikan oleh beliau semasa hayatnya terhadap parti. Allahyarham telah disifatkan

sebagai seorang yang sangat sayangkan UMNO dan sentiasa ingin mengambil berat tentang perjalanan dan pengurusan parti.

Allahyarham Tun Ghafar juga menjadi contoh tentang kesetiaan yang tidak berbelah bahagi kepada parti kerana sejak awal remaja sehinggalah menghembus nafas terakhirnya semalam, beliau terus kekal bersama UMNO. Tambahan lagi sepanjang 25 tahun sebagai Naib Presiden dan 8 tahun sebagai Timbalan Presiden, Allahyarham berpegang bahawa hanya melalui parti yang kukuh sahaja pemerintahan stabil dapat di wujudkan demi menjamin kesejahteraan rakyat dan kemakmuran negara.

Tuan Yang Di Pertua,

Sebagai seorang pemimpin negara, Allahyarham begitu komited untuk berkhidmat kepada rakyat tanpa mengira agama dan bangsa. Hakikatnya beliau dianggap sebagai pemimpin kepada semua bangsa dan telah berjasa dalam menjadi penstabil kepada parti komponen termasuklah parti MCA. Beliau juga memegang rekod sebagai Ahli Dewan Rakyat dan Ahli Dewan Undangan Negeri selama 49 tahun secara berterusan. Dalam tempoh itu beliau sebanyak 2 kali menjadi menteri yang bertanggungjawab dalam pembangunan luar bandar khususnya FELDA.

Oleh itu, saya mohon mencadang di dewan yang mulia ini agar nama beliau diabadikan di sebuah Rancangan FELDA di Jasin yang merupakan bekas kawasan parlimen beliau selama 5 penggal. FELDA Kemendor / Air Kangkong kini mohon dicadang untuk dinamakan FELDA Tun Ghafar.

Tuan Yang di-Pertua,

Tempoh lapan puluh satu tahun yang dilalui oleh anak kelahiran Kuala Pilah Negeri Sembilan ini penuh dengan suka duka pengalaman hidup yang wajar diambil iktibar oleh kita semua. Untuk pengetahuan ramai, seawal usia Allahyarham yang begitu muda iaitu 14 tahun, beliau telah mula terlibat dalam pelbagai gerakan yang memperjuangkan nasib bangsa antaranya Gerakan Melayu Muda. Jelas di sini, cinta dan kasihnya kepada tanahair sungguh mendalam dan akan kekal terpahat sebagai lambang semangat nasionalisme yang tinggi kepada kita semua terutamanya generasi muda.

Tuan Yang di-Pertua,

Harimau mati meninggalkan belang, manusia mati meninggalkan nama . Begitulah nama indah Allahyarham akan sentiasa harum dan mekar bersemadi di hati kita semua sebagai seorang pejuang kemerdekaan yang tulus, pemimpin parti yang berdedikasi, pemimpin negara yang komited dan seorang negarawan tulen yang berhemah tinggi.

Secara peribadinya juga, saya pernah diberitahu oleh Almarhum ayahanda saya tentang kepercayaan beliau yang begitu tinggi terhadap kepimpinan Allahyarham Tun Ghafar. Bahkan ramai ketika itu yang amat maklum tentang keakraban Allahyarham Tun Ghafar sebagai rakan karib politik kepada Allahyarham Tun Razak.

Tuan Yang DiPertua,

Kata orang, hancur badan dikandung tanah, budi yang baik dikenang juga. Justeru, sekali lagi saya menyokong usul YAB Perdana Menteri dengan menghulurkan ucapan takziah dan belasungkawa kepada seluruh kaum keluarga Allahyarham Tun Ghafar Baba atas pemergian beliau ke rahmatullah. DariNya kita datang dan kepadaNya kita kembali. Semoga roh Allahyarham dicucuri rahmat yang berpanjangan dan dimuliakan di kalangan orang-orang yang soleh.

Terima kasih.